



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿՐԹՈՒԹՅԱՆ, ԳԻՏՈՒԹՅԱՆ, ՄՇԱԿՈՒՅԹԻ
ԵՎ ՍՊՈՐՏԻ ՆԱԽԱՐԱՐ
ՀՐԱՄԱՆ

1279-Ա/2

23.09.2020թ.

**ՂԵՎՈՆԴ ԱԼԻՇԱՆԻ ՆԱՄԱԿՆԵՐԻ ԵՌԱՀԱՏՈՐ ԺՈՂՈՎԱԾՈՒԻ
ՀՐԱՏԱՐԱԿՄԱՆ ԾՐԱԳԻՐԸ ՀԱՍՏԱՏԵԼՈՒ ԵՎ ԳՈՒՄԱՐ ՀԱՏԿԱՑՆԵԼՈՒ ՄԱՍԻՆ**

Ղեկավարվելով «Հայաստանի Հանրապետության 2020 թվականի պետական բյուջեի մասին» Հայաստանի Հանրապետության օրենքով և Հայաստանի Հանրապետության վարչապետի 2019 թվականի հունիսի 1-ի N 661-Լ որոշմամբ հաստատված Հայաստանի Հանրապետության կրթության, գիտության, մշակույթի և սպորտի նախարարության կանոնադրության 19-րդ կետի 20-րդ ենթակետով՝ Ղևոնդ Ալիշանի ծննդյան 200-ամյակի շրջանակում՝ Ղևոնդ Ալիշանի նամակների եռահատոր ժողովածուի հրատարակմանն աջակցելու նպատակով

Հ Ր Ա Մ Ա Յ ՈՒ Մ Ե Մ

1. Հաստատել Ղևոնդ Ալիշանի նամակների եռահատոր ժողովածուի հրատարակման ծրագիրը՝ համաձայն հավելվածի:

2. «Հայաստանի Հանրապետության 2020 թվականի պետական բյուջեի մասին» Հայաստանի Հանրապետության օրենքի N 1 հավելվածի N 2 աղյուսակի «1168. Արվեստների ծրագրի» «11005. Մշակութային միջոցառումների իրականացում» միջոցառման համար (տող՝ «Աջակցություն հոբելյանական ծրագրերի իրականացմանը») Հայաստանի Հանրապետության կրթության, գիտության, մշակույթի և սպորտի նախարարությանը նախատեսված գումարներից հատկացնել 10655.2 հազար (տաս միլիոն վեց հարյուր հիսունհինգ հազար երկու հարյուր) դրամ՝ Ղևոնդ Ալիշանի նամակների եռահատոր ժողովածուի հրատարակման հետ կապված ծախսերն ապահովելու համար:

3. Հայաստանի Հանրապետության կրթության, գիտության, մշակույթի և սպորտի նախարարության (այսուհետ՝ նախարարություն) գլխավոր քարտուղարին՝ սույն հրամանի 2-րդ կետում նշված գումարը հատկացնելու համար, հրամանի ուժի մեջ մտնելու պահից 15-օրյա ժամկետում հաստատել ծախսերի նախահաշիվը և կնքել պայմանագիր (այսուհետ՝ պայմանագիր) «Ե. Չարենցի անվան գրականության և արվեստի թանգարան» պետական ոչ առևտրային կազմակերպության հետ:

4. Նախարարության մշակութային ժառանգության և ժողովրդական արհեստների և ֆինանսաբյուջետային վարչությունների պետերին՝ Հայաստանի Հանրապետության կրթության, գիտության, մշակույթի և սպորտի նախարարի 2020 թվականի մարտի 16-ի թիվ 343-Ա/2 հրամանին և կնքվող պայմանագրին համապատասխան իրականացնել պայմանագրի կատարման նկատմամբ հսկողություն, պայմանագրով նախատեսված աշխատանքների կատարման, բովանդակային և ֆինանսական հաշվետվությունների ընդունման և պայմանագրով նախատեսված աշխատանքների հանձնման-ընդունման արձանագրությունների կազմման և ստորագրման գործառույթները:

5. «Հայաստանի ազգային գրադարան» պետական ոչ առևտրային կազմակերպության տնօրեն Ա. Չուլյանին՝ մինչև սույն հրամանի 3-րդ կետով նախատեսված պայմանագրի կնքումը նախարարություն ներկայացնել համապատասխան փորձագիտական հանձնաժողովի հաստատած տեխնիկական բնութագիրը:

6. Սույն հրամանի կատարման հսկողությունը վերապահել Հայաստանի Հանրապետության կրթության, գիտության, մշակույթի և սպորտի նախարարի տեղակալ Ն.Խաչատուրյանին:

Նախարար

Արայիկ Հարությունյան

X

ԾՐԱԳԻՐ

Ղևոնդ Ալիշանի նամակների եռահատոր ժողովածուի հրատարակման

1	Կազմակերպության անվանում	«Ե. Չարենցի անվան գրականության և արվեստի թանգարան» ՊՈԱԿ
2	Կազմակերպության գտնվելու վայր	Երևան, Արամի 1
3	Ծրագրի անվանում	Ղևոնդ Ալիշանի նամակների եռահատոր ժողովածուի հրատարակում
3.1	Բովանդակություն	<p>Այս տարին հոբելյանական է Ղևոնդ Ալիշան գիտնական-հայագետ-բանաստեղծի համար: Նրա ծննդյան 200-ամյա հոբելյանն է: Այդ առիթով հրատարակության է պատրաստվել հեղինակի նամակների բացառիկ մի եռահատոր, որը մեծ հուն է ալիշանագիտության ու հայագիտության զարգացման ասպարեզում:</p> <p>Հայագիտության և հայ գրականության պատմության մեջ Ղևոնդ Ալիշանի դերը չափազանց նշանակալի է: Նրա գրչին են պատկանում հայոց պատմության, հնագիտության, աշխարհագրության բնագավառների սովորաձավալ աշխատություններ, որ փաստական հսկայական նյութ են մեր ժողովրդի պատմական անցյալի գրեթե բոլոր շրջանների վերաբերյալ: Ականավոր հայագետի այդ աշխատություններն այսօր էլ արժեքավոր են հայ ժողովրդի նյութական և հոգևոր մշակույթի պատմության մի շարք հարցերի մշակման և ուսումնասիրության դիտանկյունից: Հայաստանն իրականում չտեսած, բայց ստեղծագործական զորեղ երևակայությամբ օժտված Ալիշանը ժամանակակից սերնդին տոգորում էր հայրենասիրությամբ, արթնացնում ակտիվ, ներգործուն վերաբերմունք հայրենիքի քաղաքական ճակատագրի, նրա ներկայի և ապագայի նկատմամբ:</p> <p>Հայագիտության համար խիստ արժեքավոր են նաև Ղևոնդ Ալիշանի ճամփորդական նոթերն ու նամակները, հատկապես այն իմաստով, որ նա միայն սովորական ճանապարհորդ չէր, այլ հմուտ մասնագետ՝ պատմաբան, աշխարհա-</p>

		գրագետ, հնագետ, ազգագրագետ և բավականին հետազոտություններ կատարեց, որ աղբյուրագիտական հենք դարձան իր աշխատությունների համար: Դրանք հայագիտական մնայուն արժեքներ են: Ալիշանի ժառանգության, հատկապես և նամակների մասին ալիշանագիտության բնագավառում ընդհանրապես քիչ է գրվել: Գիտնական-բանաստեղծի նամակների այս եռահատոր հրատարակությունը ունի գիտական բացառիկ արժեք: Ալիշանի նամակները պատմում են նաև Վենետիկից մյուս քաղաքներ՝ Հռոմ, Վատիկան, Անկոնա, Մանտուա, Ջենովա և այլուր նրա ճամփորդությունների մասին՝ հասնելով մինչև Լոնդոն, Վիեննա, Փարիզ, Կանտ, Բրյուսել, Բեռլին, Ժնև:
3.2	Նպատակ	Ծրագրի իրականացման նպատակն ինչպես Ղևոնդ Ալիշանի ժառանգության պատշաճ հրատարակումն ու հանրահռչակումն է, այնպես էլ հայագիտության զարգացումն ու աղբյուրային ուսումնասիրությունների վերհանումը խթանելը:
3.3	Անցկացման ժամկետ	2020 թվականի սեպտեմբեր - դեկտեմբեր
3.4	Անցկացման վայր	Երևան
3.5	Ակնկալվող արդյունքներ	Նամակները, որ հաստատում են Ալիշանի սերտ կապերը հայ և եվրոպացի մի շարք անվանի գիտնականների հետ, բեղուն կլինեն և մեծ օգուտ կբերեն հայագիտությանն ու հայ մշակույթի զարգացմանը, մեծարժեք ընծա կդառնան պատմության, հնագիտության, դրամագիտության, ձեռագրերի հայտնաբերման բնագավառներում:
3.6	Ոչ ֆինանսական ցուցանիշներ	3 հատոր, յուրաքանչյուրից՝ 300-ական օրինակ